

## REGLUGERÐ

### um Fræðslusjóð brunamála.

#### 1. gr.

Sjóðurinn heitir Fræðslusjóður brunamála.

#### 2. gr.

Markmið sjóðsins er að veita slökkviliðsmönnum, eldvarnareftirlitsmönnum og öðrum þeim sem starfa að brunamálum styrki til náms á sviði brunamála.

Markmiði sjóðsins skal náð með styrkveitingum vegna framhaldsmenntunar, endurmenntunar, rannsókna og þróunarstarfa vegna brunavarna.

Sjóðurinn greiðir styrki til rannsókn- og þróunarverkefna, námskeiðsgjöld, ferða- og dvalarstyrki, styrki vegna námskeiða, aukabókun fyrir óvenju umfangsmikil verkefni, laun á námsleyfistíma og aðstoðar styrkhæfa umsækjendur til endurmenntunar eða á annan hátt samkvæmt ákvörðun stjórnar.

Stjórn sjóðsins er heimilt að standa fyrir námskeiðum vegna framhalds- og endurmenntunar í brunavörnum.

#### 3. gr.

Stjórn Brunamálastofnunar ríkisins fer með stjórn Fræðslusjóðs brunamála. Skipunartími sjóðsstjórnar er sá sami og kveðið er á um í 3. gr. 1. nr. 41/1992, um brunavarnir og brunamál.

#### 4. gr.

Tekjur sjóðsins eru:

- a. Hlutfall brunavarnagjalds sem nema má allt að fimm hundraðshlutum á ári hverju. Ráðherra ákveður hlutfallið í upphafi hvers árs með bréfi til stjórnar Brunamálastofnunar.
- b. Vaxtatekjur og verðbætur.
- c. Aðrar tekjur.

Sjóðurinn skal ávaxtaður á þann hátt sem sjóðsstjórn telur hagkvæmast á hverjum tíma.

#### 5. gr.

Styrkir úr sjóðnum skulu veittir á grundvelli umsókna. Stjórn sjóðsins skal ákveða upphæð styrkja, fjölda og úthlutunartímabil. Hún skal auglýsa eftir umsóknum um styrki úr sjóðnum í a.m.k. einu dagblaði. Henni er enn fremur heimilt að auglýsa eftir umsóknum í félagsblöðum þeirra sem styrkhæfir eru samkvæmt 2. gr.

#### 6. gr.

Reikningsár sjóðsins skal vera almanaksárið. Reikningar skulu endurskoðaðir af löggiltum endurskoðendum eða ríkisendurskoðun.

#### 7. gr.

Árlega skal stjórn sjóðsins gera skýrslu þar sem gerð er grein fyrir fjárhag hans og starfsemi síðastliðið reikningsár. Skal skýrsla þessi send félagsmálaráðherra og helstu samtökum þeirra sem geta sótt um styrki úr sjóðnum.

8. gr.

Reglugerð þessi er sett samkvæmt 24. gr. laga nr. 41/1992, um brunavarnir og brunamál, og öðlast þegar gildi.

*Félagsmálaráðuneytið, 18. mars 1993.*

**Jóhanna Sigurðardóttir.**

*Þórhildur Líndal.*

## REGLUGERÐ

### um breyting á reglugerð nr. 118/1990 um einkennisbúninga, merki og búnað lögreglumanna.

1. gr.

Liður 3.3 orðist svo:

**Einkennishnappar** lögreglunnar eru hringlaga, gylltir með upphleyptri mynd af merkingu „Hönd og auga“. Hnapparnir eru í tveimur stærðum. Minni gerðin er 16 mm en stærri gerðin 21 mm í þvermál.

Áfesting hnappanna er með tvennum hætti, annars vegar ísaumaðir og hins vegar pressaðir (smella). Hnappa í einkennishúfu má festa með spennum sem sveigðar eru til hliðanna, innan við svitaband húfunnar.

Hnapparnir eru tvenns konar, þannig að fingur vísi ýmist lárétt til hægri eða vinstri með þumalfingur efstan.

Hnapparnir skulu festir á einkennisfatnað, horft framan á þá, sem hér segir:

Í einfaldri töluröð skulu fingur vísa til hægri með þumalfingur efsta.

Á ermum, brjóstvösum og húfu skulu fingur vísa að miðju með þumalfingur efstan.

Á axlasprotum og smeygum skulu fingur vísa að miðju með þumalfingur aftastan.

Í tvöfaldri töluröð skulu fingur vísa að miðju með þumalfingur efstan.

2. gr.

Liður 4.1.2 orðist svo:

Í lögreglu ríkisins gildir ein númeraröð fyrir fastráðna lögreglumenn, og annast dómsmálaráðuneytið úthlutun númera. Númerið er myndað af fjórum tölustöfum, þannig að fyrstu tvær tölurnar gefa til kynna síðustu tvær tölur þess árs sem maðurinn hóf starfsferil sinn. Síðari tvær tölurnar í númerinu sýna hvar í tímaröðinni hann hóf störf á árinu, miðað við aðra lögreglumenn sem hófu störf á sama ári. Fyrir lögreglumenn sem ekki eru fastráðnir svo og héraðslögreglumenn gildir sérstök númeraröð sem mynduð er af stafnum H og hlaupandi númerum frá 001-999, miðað við upphafsdag ráðningarsamnings (H001-H999).

3. gr.

Reglugerð þessi sem sett er samkvæmt 11. gr. laga nr. 56/29. maí 1972 um lögreglumenn, sbr. og 24. gr. laga nr. 38/1954 um réttindi og skyldur starfsmanna ríkisins, öðlast þegar gildi.

*Dóms- og kirkjumálaráðuneytið, 18. mars 1993.*

**Þorsteinn Pálsson.**

*Hjalti Zóphóníasson.*